

VALNEO ZONCH "ROSSET" (1925 - 1975)



Nol veva nancja finît di pronunziâ, cul so fâ rabiôs, la frase: “Va fûr dai pîts che no ài timp di piardi cun chistis monadis”, che al bocâl di fiar za al rodolava di lunc da strada dopo vè russât i flancs pa cogolada da andronuta che a partava fin ta sô oficina in plaça a Romans. Chist fat al è capitât tai prins agns Sessanta a Romans, intal moment che un siôr dal lûc al era lâ dentri inta sô oficina e incautamente veva domandati se al varès podût saldâgi al bocâl che gi spandeva. Un fat, podìn zontâ, che a vin urût scartaçâ dal polvar sença nissuna tristeria, ma dome par fâ capî di ce pasta che al era fât al nestri pûr Valneo Zonch, o Valneo “Rosset”, come che duçj lu clamavin in paîs e che i “Scussons” a àn urut dedicai chist an al Lunari pal 2011. Un om, Valneo, di pocjîs peraulis, che al distrigava i soi discors, sclet e istintîf tant che leâl, onest e sincîr. Un om che al podeva someâ massa serio ma che invezit al era plen di boncj principis e di fundamentâi valôrs morâi e sociâi, che al à metût in pratica sença compromès e sença ricams di sorta via pa sô vita, massa curta, che al à simpri spindût cun slanç e massim impegn, par miorâ la societât e la vita dal nestri paîs e da nestra int, soradut traviars l’impegn politic cul nestri Comun, sei come conseîr sei come assessôr. Intal stes timp no si pol dismenteâ il so larc impegn e il so passionâl contribût dât in clâf sportiva par fâ cressi la Pro Romans intal moment che vevin afidâti la vuia tecnica e dirigenziâl da seconda squadra zala e rossa: al “Citi” lu clamavin i sportîfs dal paîs, e lui al era una vora braurôs di cuviarzi chel rûl, vuadagnant la stima e il biel ricuart che ancjamò i dedichin i soi ex zuiadôrs, mostrant un lât alegri dal so caratar, che bisugnava savê tirâgi fûr e che in altris situacions di râr al mostrava. Nassût tal 1925, Valneo al era un grun brâf a scuela, tant che i mestris vevin conseât a Toni e a Irma, i soi gjenitôrs, di mandâlu indenant, ma stant che li cassis da famea a erin plui che vuedis, a Valneo à tocjâti di lâ a lavorâ cun chei che asfaltavin stradis e intal stes timp al coreva ancja cu la bicicleta, una sô granda passion, ancja se par resons di salût al à dovût molâ cuasi daûrman. Biciçleta, mi plâs ricuardâ, che veva regalâti so

pur fradi Fulvio cui prins beçs vuadagnâts sui cjamps di balon, cuant che al è lâ a zuiâ cul Milan prima di passâ al Messina in Serie B. Vin ancja di dî che Valneo al era movût di un’altra granda passion, i motôrs, e par chist al veva imparât a fâ al mechanic di motos e soradut di Vespis, che par lui no vevin nancja un segret, bastava lassâlu fâ sença fâi primura, se no al era miôr partâ a comedâ la Vespa cà di un altri mechanic. E a fuarça di sacrificis, intal 1956 al à rilevât l’oficina in plaça dei Caduti. I la veva ceduda un ciart siôr Boaretto di Roncjis, che ancja lui, tal 1954, la veva rilevada dal mitic Alessandro Schnableger, il “Xandi” da lienda, muart a Manzan in chel stes an dopo di un scuintri cu la moto biel che al lava a Udin. Dongja da oficina, Valneo al veva viart ancja una piçula butega di tocs di bicicleta e di motos e parsora da stessa al era a stâ cu la famea, prima di trasferî oficina e abitazion in via Roma, dulà che la muart a lu à partât via massa a la svelta, cun duta la sô professionalitât e al so snait, lassant leteralmente a pît i tancj che cu li sôs Vespis i fasevin visita cuant che vevin un vuast.

Edo Calligaris